



ATASSUT

UKA 2016/117

Siverth K. Heilmann

23. 10. 2016

Uunga siunnersuut: Kommune-ni suliassaqarfiit aaqqissuuteqqinneqarnerata allanngortinneqarneranik Inatsisartut inatsisaat nr. xx, xx,xxx 2016-imeersoq.

(Qaasuitsup Kommunia marlunnut avinneqarnissaa).

(Naalakkersuisut Siulittaasuat)

Aallarniutigalugu ATASSUT-mit erseqqissumik oqaatigissavarput ATASSUT-mit isumaqaratta Qaasuitsup Kommunia marlunnut avinneqarani pingasunut avinneqartariaqartoq - tamannalu matumani oqaaseqarnitsinni ilaatigut tunngavilersussassavarput, tamatumallu pinnginnerani aamma erseqqissaatigissavarput inatsisissatut siunnersuutip imai ataasiakkaat oqaaseqarfiginatigit, siunnersuummut tunngavilersuut tassalu Qaasuitsup Kommuniata marlunnut avinniarneqarnera ATASSUT-mit isummorsorfigissagatsigu.

Qaasuitsup kommuniata avinneqarnissaa pillugu innuttaasut taasitinneqareersimapput, sulilu inuiaqatigiinni oqallisigineqarpoq Qaasuitsup Kommuniata avinneqarnissaa qanorpiaq pissanersoq. ATASSUT-mit 2010-mili siunnerfigiinnaavissimavarput Qaasuitsup Kommuniata pingasunngorluni avinneqarnissaa, tamatumani eqqarsaatigisivagut illoqarfiit imminut qaninnerusut, innuttaqassutsikkut amerlassutsit minnerunngitsumillu aamma sumiiffiit aallaavigalugit inooriaatsit ingerlanneqartut eqqumaniarfigineqarnissaat.

ATASSUT-mit isumaqarpugut Qaasuitsup Kommuniata pingasunngortinneqarluni avinneqarnissaa imatut aaqqissuunneqartariaqartoq - avannaaniit:

- Qaanaaq, Upernavik aamma Uummannaq
- Ilulissat aamma Qeqertarsuaq
- taavalu Qasigiannugit, Aasiaat aamma Kangaatsiaq

Matumani Qaasuitsup Kommuniata avinneqarnissaanut atatillugu ATASSUT-mit pingaartilluinnakkatta ilagivaat innuttaasut naapittarnerini oqariartuutit anngunneqartartut tusaaniarneqarnissaat minnerunngitsumillu aamma oqallifinni assigiinngitsuni soorlu tusagassiutini, innuttaasunik ataatsimiisitsinerni assigisaannilu isummersuutit pimoorullugit tusaaniarneqarnissaat.

ATASSUT-mit pingaartipparput innuttaasut qanimut suleqatigineqarluarnissaat - suliniutimmi pitsaanerpaamik angusaqarfiusarput ataatsimuussuseqarnikkut suliat ingerlanneqaraagamik - matumani aamma taamaattariaqarpoq - avataaniit qulangersimaarneqartutut innuttaasut misigitinneqaraangamik toqqissisimannginneq pilertarpoq, innuttaasullu oqartussaaqataaerermikkut killilersugaasutut misigisimatinneqarnerminnik, kivitseqataanissamut kajumissusiianeqartarlutik.

Taamaattumik ATASSUT-mit matumani Inatsisartuni ilaasortaaqativut sapiissuseqarlutik namminneq isummersorsinnaassutsiminnik takusitsinissaannut assut kajumissaarumavagut - innuttaagut tassaasut aamma qinersisartussi piumasaat pitsaasumik inerniliiffigissallugit suleqatiseraatsigit.

Aap, aallaqaammut aningaasartuuteqarnerunermik naleqartussaavoq, kisianni uungaanaq isiginata siunissaq ungasinnerusoq isiginiartariaqarparput, minnerunngitsumik inuit toqqissisimasumik inuuneqassappata, taava aamma qanimut suleqatigalugit ilusilersueqatigineqarniarlik - ilumoorsinnaangilaq arlaatigut unamminarsinnaasumi inissisimasoqaleraagat tamatigut avataaniit sulisitat oqariartuutaat qujarullugit tiguinnartassagivut allaffissornikkut, aningaasarsiornermi inatsisilerinikkullu nunatta avataani piginnaasaqarluartut tatigineqartuuneri piinnarlugit.

Piffissanngorpoq uagut innuttaasutut piumasatta piviusunngortinneqarnissaannut tamakku erseqqarinnerusumik oqariartorfigineqartalernissaat - UAGUT innuttaasut piumasatta pitsaanerpaamik piviusunngortinneqarnissaannut ikiortiseriinnartussaavagut - taakku piumasaat eqqornerusorisaat aallaavigiinnarnagit!

Matumanilu suliame isumaqarpugut BDO-p nalunaarusiaanni inerniliinerit inituvalaarujussuartoq - imaangitsoq suliai tatiginngikkivut, kisianni sulisinneqarnerinut uagut qinersisartutta innuttaaqatitta oqariartuutaat aallaaviuvallaarsimannginnera ersarissingaluttuinnarpoq.

Taamaattumik ATASSUT-mit innuttaasut piumasaat suli tusaaniarneqarnerusarnissaat pingaartilluinnarlutigit, matumani siunnersuut taama isikkoqartillugu akuersaarsinnaanngivipparput. Piareersimalluinnarpugulli suliap sukumiisumik ingerlateqqinneqarluni suliareqqinneqarnissaannut ATASSUT-mit peqataalluinnarnissatsinnut, taamaattumik aamma ATASSUT-mit kissaatigaarput ataatsimiitsitaliami ATASSUT-mit ilaasortaataitaqarfiginngisatsinni oqaluuserisassanngorluni sularineqassappat periarfissinneqarumaarluta suleqataanissatsinnut.

Taamatut ATASSUT-mit oqaaseqarluta, siunnersuutip taama isikkoqarluni itigartitsissutigineqarnissaa innersuussutigissavarput. ATASSUT-mili ikinnerussuteqassagutta piareersimavugut ataatsimiitsitaliami sukumiisumik isummersoqataanissatsinnut, taama oqaaseqarluta kingumut inatsisartunut ilaasortaaqativut ATASSUT-mit kajumiissaaqqissavagut sapiissuseqarlusi innuttaaqativut pillugit suleqatigisigut.

Qujanaq!